



# LA PATRIE DAL FRIÛL

SFUEI MENSÎL INDIPENDENT

Direzion e Aministrazion - Udine - via del Cottonificio 129

Tassa pagata / Taxe perçue Udine Italy - mensile / mensil spedizion in abonament postâl Poste italiane s.p.a.



UN FURLAN A MILAN

## Il leam che al reste

Dree Venier

Cressi a Milan fin di picinins e mantignî dut câs un leam fuarton cul Friûl.

◆ E je la storie di tancj fis di emigrâts furlans te citât meneghine, e Antonio Cosmacini al è un esempli perfet.

◆ «Ma jo o soi nassût a Gurize!» al ten a marcâ «E ancjemò o soi resident, a Cormons» di dulà che vegnin i siei gjenitôrs. Antonio al à vût la *fortune*, peraulis sôs, di jessi nassût in Friûl parcè che i siei, che a erin za a stâ a Milan, si cjatavin in feriiis «a cjase».

◆ Dopo di chê fortune Antonio, che cumò al à cincuant agns, al à passât la vite a Milan, ma simpri cul cûr ancje in Friûl. «Gno pari di piçul mi puartave ai events dal Fogolâr di Milan, ai timps che al jere Ardito Desio president.»

Une volte cressût, la passion pal Friûl al à tacât a seguile bessol «Cuant che o jeri universitari o levi aes trasfertis dal Udin di bessol, in tren. E cussì o ai cognossût i fantats dal Nucleo Milano, un biel trop di zovins furlans che a jerin a stâ o nassûts a Milan.»

◆ Ma la passion no si è fermade al balon: Antonio al è stât fra i fondadôrs de associazion *FAF-Fantats Furlans*. Un trop di zovins che a forin i prins a fâ mauius par furlan e che cualchidun si visarà che a produserin i libretuts clamâts *Fregul* cul formât dai *Millelire* che a levin tant in chei timps. Trops agns sono aromai? «O vin fat la fieste dai 20 agns intal 2016! Cumò però no sin plui atîfs.» Cumò al à metût sù famee, al à doi fis che no ur à fat mancjâ nancje a lôr il leam cu la Patrie «Ogni an une part di feriiis lis fasin a Grau, clâr! Ancje se no vignin plui tant dispès a Cormons come cuant che e jere la none».

◆ Ancje se si impromet di dedicâ plui timp al Friûl, prin o dopo, di fat prime di saludâsi Antonio mi dîs «I ten a marcâ che tal imprimil *FAF* si clamave *FAF-Fuarce Autonomiste Furlane*. Plui in là, cuant che o varai plui timp bisugnerà tornâ a cjapâ sù chel discors».

◆ Benon, Toni, alore ti spietin par tirâ sù i destins de Patrie. ■



EDITORIÂL - LINT AUTONOMISTE

## PE RINASSITE E COVENTE UNE RISPUESTE DI POPUL

Dree Valcic

◆◆ Nô furlans o sin simpri stâts bogns di tornâ a scomençâ dut dopo des sdramassadis cjapadis. Che a sedin stadis provocadis di causis naturâls o de balordisie dai oms, no si sin pleâts mai “al destin cinic e imbroion”. Ciert, i mûts par ripiâsi a son stâts ogni volte diferents, dolorôs tant che la emigrazion, i timps dispès plui luncs di ce che o speravin, e dome cu la ustinazion, cu la indurance, cu la inteligence o vin rivât a vinci. Vuê, però, tirâsi fûr de epidemie, sedi sanitarie che economiche, al è plui difil parcè che la classe politiche e dirigjente che nus guverne no je in stât di ufrî chê rispueste minime che si spietressin, intune Italie che ancjemò une volte e mostre ducj i limits di inefficienze, coruzion e

clientelism che le caraterizin.

◆◆ E ven a mancjâ chê “linie di comant” buine di imprimi velocitât aes rispuestis, clarece su lis leçs che a coventin par sostignîlis.

Dulà volino là, finide la emergjence, simpri che si vueli domandâsai? O ai pôre di fat che masse di lôr a vuelin tornâ a chê che i disin normalitât: ducj un pôc puars, tancj simpri plui siôrs intun mont che si suicide biel planc. Cence nissune idee di futûr. Ma, cence prospettive e nas la rassegnazion che, di chescj timps, e cjate une aleade potente inte mancjance di comunicazion, di socialitât fate di cjar e vues e no di ordenadôrs frêts.

◆◆ Di là des soferencis, dai

corots, la ereditât plui pesante che il Covid nus lasse e je un sens di solitudin, di individualism dulà che l'interès corporatif al somee che al prevali sul ben comun. E cussì no si va di nissune bande.

◆◆ Psicologjie minude, al disarà cualchidun, e al sarà forsît ancje vèr, ma di ciert vuê ognidun di nô si sint cuasi abandonât devant des contrarietâts e la braûre di une rispueste di popul, come intant de ricostruzion, no slûs tal scûr.

◆◆ Ve, alore, la clamade a cui che – o vin di dilu cun coraç – nus rapresente intes istituzions: clamait a racuelte i furlans, che si strenzin ator di un program di rinassite, sempliç e atuabil, là che ae sperance di cambiament si acompagni il cambiament reâl. ■

❖ a pagine 2

### I MIEI DÏS SUL PUINT DI GJENUE

Il viadot Morandi come metafore de rinassite possibile di Oscar Puntel

❖ a pagine 6 e 7

### GNOVIS MUSIS DE CULTURE

Teatri, musiche e letature pal 2021 di Erika Adami, Tarcisio Mizzau e Dree Venier

❖ a pagine 5 e 12

### PATRIARCJIS FÛR DAL ORDENARI E CUISTRISTORIE DE OCUPAZION VENITE

di Diego Navarra e Agnul Floramo



UNE FURLANE A ROME

## Il destin te danze

Floriana Bulfon

◆◆ Rome e je un bagn inte storie e inte lûs. O 'ndi ami la magjie e o cîr di vivile planc, cu la lizerece di un bal”.

◆ Erica Modotti e je di pocjis setemans inte Capitâl, dopo jessi risultade prime par ponts aes selezions pe prestigjose *Accademia di Danza*. «Balâ al è alc che mi à perseguitât simpri. Ogni volte che o ai scartât cualchi ocasion, chês si son presentadis di gnûf » e conte cheste udinese di 34 agns. Lis primis zirevoltis lis à fatis a cuatri agns, cuant che e je restade inmagade devant dai quadris che a figuravin balarinis; dopo, passion e talent a son cressûts inte scuele Ceron di Udin, fin a chest travuart, che e vûl dedicâ ai artisej colpîts cun durece de crisi in timp di pandemie.

◆ Il so però nol è un percors univoc: «la mè famee no à pensât mai ae danze tant che un lavôr», e pant. E cussì si lauree al Politecnic a Milan in *Interior design* e torne in Friûl pront par une cariere tra studis di progettazione e di architettura: «il setôr al jere in crisi, o ai mandât tancj curricula, nuie. E dopo di gnûf la danze: il gno mestri mi à fevelât dal insegnament e o ai capît che passâ cognossincis a chei altris mi plâs tant».

◆ E decît duncje di notâsi a un cors bienâl a Pavia, cualchi sostituzion e dopo e tache l'insegnament propit inte scuele di danze di Udin dulà che e je cressude.

◆ Cumò un gnûf pas indenat: il bien specialistic ae *Accademia Nazionale di Roma*, la uniche ricognossude dal MIUR tant che un titul di laurea.

◆ «Se si sielç di là daûr di un sium si acetin i sacrificis di timp e di vite. La danze e domande tant, ma il sfuarç al è ripaiât des emozions e de passion» e rason. Ogni di le spiete un program fis di lezioni teorichis e praticis: «Chi o soi une novele, o torni a scomençâ dut di zero. Al è tant di imparâ e o soi contente». Dopo lis lezioni, lis corsis dilunc dal Tevere, la concession di une fermade li dal plui antic *maritozzaro*, dulà che il dolç tipic roman, fof e saurît, si cerce di 60 agns, e la nostalgjie: «mi mancjin il gno compagn e la mè famee, ancjemò di plui cumò che no podin viazâ. Mi mancje la mè tiere, lis lidris contadinis». E mi disvele un cruzi: «o capis il furlan ma no lu feveli». ■

UN FURLAN VIE PE LIGURIE

# I miei dîs sul point di Gjenue

## L'invîat de Rai sul viadot Morandi al conte il dolôr e il tornâ a nassi di int che no si plee al destin

Oscar Puntel



Setembar, suspîet di normalitât, lis musis a jerin ancjemò dutis vîers di lui, che nol jere plui chel di prime, ma sdrumât. Il bocon a soreli jevât come se al cricàs dal cîl. In chê di, lis mestris ur faserin cjatâ une poesie su lis lavagnis: "Ce maravee un point! La linie, un arc parsore dal gredei de citât». Propit come in Friûl tal '76, ai fruts tes scuclis in tende: judâts a capi chês muarts e a cirî un parcè che chel "ziment agns Sessante" al fos plombât jù, cambiant par simpri la lôr esistence e chê des lôr fameis, scorsâts di cjase, di corse e cence mateçs. Un tradiment: lôr nassûts cul point sore dal cjâf, dutun cun

chel tet che nol pues mai fâ dal mâl. ♦ Lis feridis, il dolôr. Fintremai dai pompîrs, che culî a lavorarin. Cuant che o ai savût che e jere une scuadre di Pordenon, o soi lâ subit a cirî. O vevi dibisugne di jentrâ in confidence cun lôr che a rivavin de mê stesse tiere, parcè che in situacions dal gjenar i rapuarts cui socoridôrs a son simpri cetant formâi. Mi impensi ancjemò la muse rosse di soreli e di sudôr dal comandant, Stiefin Zanut, ingropât: «O vin di fâ i conts ancje cu la nestre frustrazion: pes cundizions di cemût che o cjatin chei biâts e par chê voie di salvâ,

ma che no si rive adore». A cirivin ancje Mirko, che no si cjatave. La sô storie mi à butât devant i limits dal gno mistîr, dantmi cualchi sens di colpe, che mi puarti ancjemò daûr. 33 agns, il zovin al lavorave intun magazen propit sot dal Morandi, cuant che il point al è vignût jù. I gjenitôrs no molarin un minût lis rostis dal Polcevera. No si saveve ben ce muse che a vevin, ma zirant jenfri lis tendis dal prin socors de Crôs Rosse o jeri rivât adore di capi cui che a jerin. «Mi racomandi: cjape sù dut, ma di lontan», i ai dit al gno cameraman. Jo mi soi svicinât cul microfon e ur ai domandât: «Ce us âno dit?». A

vaivin e a jerin sot shock: ancjemò in di di vuê no soi sigûr che a vessin viodût il microfon. «Achî a passin lis oris e no si sa nuie: ma jo o vuei puartâmal a cjase, il gno frut», mi rispundê il pari. Po dopo, o ai fate la domande sbaliade: «Cui jerial Mirko?». "Jerial", al passât. Dome plui tart mi soi rindût cont che al è come se o ves scjafioiât lis lôr sperancis. Tal servizi, che o soi lâ a cirî par tornâlu a viodi, o ai comentât cussî chê interviste "di confin": "Nol è nuie di plui orent pai gjenitôrs, che sorevivi ai lôr fis". Lu à tirât fûr ai 18 di Avost, cuatri dîs dopo che il point al è vignût jù. Ultin: il cuarp di Mirko, che no si cjatave.

♦ Lis feridis, la frustrazion, il dolôr. La prove dal riscat. Fâ di corse, un monitori. Cussî par il gnûf viadot "Genova San Giorgio" a doprarin il "Model Friûl", ancje se cumò al è di mode fevelâ di "Modello Genova". Ma simpri chel al è: un commissari cun podei decisionâl, proceduris semplificadis par l'afidament dai cantîrs, decentrament aministratif e finanziari. Lu ai contât in lunc e in larc il gnûf point: cerimoniis e primis pieris. Sei stât il prin cronist a cjaminâi parsore. Varai ancje, dal sigûr, esagerât di cualchi bande. Resti convint che il vèr riscat al sedi tal no dismenteâ ce che cheste vicende nus à di insegnâ. E al sedi anche tal ricuardâ, simpri, che a 'nd è stâts 43 muarts. Tal memoriâl dal Point, un piçul parc scuasi sot dal pilon 9, chel colât, ju impense ancje un toc di Cjargne: il grant plancum taront, dulà che a son plantâts 43 arbui – un par ogni vitime – al è stât metût adun doprant i arbui dai nestris bosc, butâts ju di Vaia, tal atom dal 2018. Indaûr: il dolôr e il tornâ a nassi, la distruzion e la costruzion, la muart e la vite. La sintesi di dut. ■

«A lore, chest point?!»: me fasin ancjemò cheste domande, ogni volte che o torni a Paluce. Come pûr in tancj sui social o sul telefonut, ae fin a van a finile simpri li: la grande tragedie che ai 14 di Avost dal 2018 e je colade su Gjenue. Il Point Morandi vignût jù: 43 muarts, 600 sfolâts. O jeri li: o ai viodût e o ai contât dut pai tg de Rai, redazion di Gjenue, dulà che o lavori aromai di doi agns. Cumò che un toc di cheste storie e je finide, cun 1067 metris di point ducj sù, al è rivât il moment di contâus ce che a son stâts chescj doi agns: ce che al à volût di cjatâsi denant de soference des fameis che a àn pierdût fis e parinçj, de rabie de int slontanade di cjase, denant dai pompîrs che a sgarfavin dentri dal riu Polcevera. Ma ancje di ce che al vûl di tornâ a scomençâ, tirant sù di corse ce che agns di malegracie a àn butât jù intun secont, in chê vilie de Madone di Avost. Mi someave di jessi dentri di une storie za vivude: il dolôr e il tornâ a nassi, la distruzion e la costruzion, la muart e la vite. La sintesi di dut. Come se al tornâs a vivi chel traume, comun a ducj i furlans e che - jo masse piçul - lu ai vivût "di ripuart". O contin storiis, ma il dolôr che ti à segnât la vite al pues diventâ, e spes al devente, il filtri che tu contis chês storiis.

♦ O 'nt varès centenârs, di ricuarts, dai miei dîs sul point di Gjenue colât e tirât sù gnûf. ♦ Lis feridis psicologjichis sui fruts dal cuartîr, li sot: Certosa. Mi àn impensât chês patidis dai nestris, intai dîs dal Orcolat. O ai contât dal lôr prin di di scuele, un mê dopo dal point colât: a vevin il Morandi "piturât" ogni di sui barcons. Simpri li, cu lis machinis parsore. E in chê zornade di mieç

INT DI CJARGNE

# Clavaiis e il Comitât dai bens di ducj

Marta Vezzi



CLAVAIIS

teritori."

♦ E chest al è ce che e à fat la int di Clavaiis! Cul supuart di "Alleanza Friulana Domini Collettivi", un

grup di personis vuidadis dal zovin Mattia Primus, e à rivât a costitui un Domini colettif. Al dîs Mattia: "o sperî e mi auguri che dut chest

al sedi un esempi ancje par altris comunitâts!"

♦ I pas impuartants a son stâts: • aprovazion dal regolament eletoral (sul stamp di chel alegât ae delibere n. 207 dal 2011 de Regjon F-VJ); • indizion des elezions par elei i membrîs dal Comitât frazionâl. Lis elezions a son stadis fatis ai 13 di Setembar dal 2020 tal fabricât de ex Latarie di Clavaiis; a son stâts elet Giovanni Brovedan, Marzia Pachner, Mattia Primus, Dario Puschiasis e Mirco Zanier; • presentazion dal Statût che al è stât aprovât de Assemblee de Comunitât ai 25 di Otubar; • dipuesit e regjstrazion dal at constitutif.

♦ "La motivazion principâl de gestion autonome che la int di Clavaiis e à decidût di puartâ indevant – al dîs Matteo Primus – e je chê de cure e de tutele dal teritori. O fevelin di 120 etars, massime di zonis di bosc, che tai ultins agns a stan paiant un deperiment no indiferent. Di chê altre bande, la situazion no pues

jessi diferente cu la gestion in mans aes aministracions comunâls, cun comuns simpri plui in dificolât dal pont di viste des risorsis e dal personâl (e Davâr nol fâs eccezion, cu la vastità dal so teritori e ben 13 frazions) e no si pues pretindi che a gjestissin tal mût miôr pussibil i teritoris, in particolar chei boschifs che a son dal dut bandonâts.

♦ Di fat, la Comunitât di Clavaiis e je convinte che par garantî la atenzion e la cure costante che i bosc a domandin (in particolar vuê, dopo de burascje Vaia), la gestion e à di jessi in man a cui che il teritori lu cognòs miôr di altris e duncje aes personis de comunitât che a àn un interès diret ae conservazion dal propri patrimoni boschif ma ancje agricul e pastorâl. Cun di plui, cuntune gestion atente, ancje se il marcjât dal legnam al è inmò in crisi fuerte, si puedin otignî jentradis economicis che a podaran jessi dopradis no dome par mantignî e par tutelâ il teritori, ma ancje par piçulis iniziativis e oparis te frazion, a benefici diret di dute la comunitât." ■

La piçule comunitât di Clavaiis, intal Comun di Davâr, a 827 metris sul nivel dal mâr e poiade tal versant Ovest dal Çoncolan, e à di pôc constituit, su la fonde de Leç dal stât n. 168/2017, il propri Domini colettif. Un ent che, midiant dal Comitât, al à l'obietif di gjestî di bessòl il teritori de Proprietât colettive de frazion di Clavaiis. ♦ "Lis Proprietâts colettivis – al dîs Mattia Primus di Clavaiis – a son clamadis spes "Ûs Civics" ancje se no in maniere corete. Chest tiermin al è stât creât de machine burocratiche dal fassisim che e à cirût, cuntune leç ad hoc (la n. 1766 dal 1927), di eliminâ i dirits des piçulis comunitâts talianis a pro dal stât e des grandis aziendis. Par fortune, no àn rivât adore, e soredu tes zonis di mont i dirits di fruizion e di utence di chescj teritoris a son restâts a ogni singule comunitât; la comunitât, come confermât ancje de leç dal 2017 "Normis in materie di domini public" e à la pussibilitât di constitui il propri ent pe gestion dal so

## AMBIENT

# In Friûl e je ancje la Begarole dai Urâi

Gianluca Rassati

**L**a Begarole dai Urâi (*Strix uralensis*) e je un uciel di rapine noturni cuntune grande distribuzion che e va de Scandinavie, passant pe Russie e pa la Asie, fin al Gjapon. A son ancje altris popolazions, par esempli te Europe centrâl e sudorientâl (*Strix uralensis macroura*), che a son consideradis relits glaciâi, ven a stâi che si son originadis dai individuis che a àn scugnût sbassâsi di latitudin par vie de glace che e rivave a latitudins simpri plui bassis, par colpe dal cambiament dal clime leât aes glaciasons. Po dopo, cuant che la glace si è ritirade, no àn bandonât dal dut lis zonis dulà che a jerin rivadis.

◆ In Italie, la Begarole dai Urâi e à tacât a nidiâ tai agns '90 dal secul passât, intes Vals dal Nadison. Intal stes periodi, e je stade cjatade ancje intal Bosc dal Cansei. Tai ultins 20 agns, l'autôr al à condusût studis par cjatâ la presince di popolazions in altris zonis, par verificâ la nidificazion, par definî l'areâl talian e la só evoluzion intal timp, par individuâ i aspjets leâts ae conservazion. Cun di plui, fra il 2013 e il 2018 a son stadis cjapadis in considerazion trê areis cul obietif di otignî valôrs di densitât tal periodi riprodutif. Lis trê areis, che a son rappresentativis dai habitats dulà che e vîf la specie a Sud des Alps, si cjatin ae estremitât nordorientâl dal Stât, ai confins cun Austrie e Slovenie in Comun di Tarvis, fra il Jôf dal Montâs, il Jôf



HABITAT DE BEGAROLE DAI URÂI SU LIS ALPS JULIIS

Fuart e la Mont Cjanine in Comun di Seluse e in piçule part in chel di Tarvis, e intes Prealps Cjargnelis intai Comuns di Verzegnis, Trasaghis e in piçule part in chel di Vît.

◆ Tal 2001 al è stât un contat te Val di Ucee, ma il prin nucli di riprodutôrs che al è stât cjatât di là dai doi che si cognossevin bielzà, al è stât - intal 2004 - tes Prealps dal Arzin dulà che, te val dal Palâr, l'an dopo e je stade aciertade la riproduzione. Tal stes timp, a conferme de expansion viers de zone alpine, la Begarole dai Urâi e je stade individuade sui Monts Duron e Cuar, pôc parsore di Tumieç.

◆ Fra la seconde metât de prime desene di chest secul e i prins agns de seconde, a son stadis altris segnalazions che a àn confermade la presince in areis cognossudis e che a àn provât la espansion in altris: Alte Val dal Tiliment (Comuns di For Disore e For Disot), Prealps Juliis (par esempli tal Cjanâl di Resie), Valcanâl (Val Saisare, Val dal Riu dai Salets). Tal 2011 è stade verificade la prime nidificazion in zone alpine taliane (Val de Bût, Alps Cjargnelis). Subit dopo, la Begarole dai Urâi e je stade cjatade intes zonis fra la Mont di Verzegnis e la Plombade, fra i Plans dal Montâs e la aree di Nevee, e fra lis Caravanchis e

il grup dal Mangart. Tal 2013, la nidificazion e je stade aciertade tal Cjanâl di Resie e, pe prime volte intes Alps Juliis, tal 2014 inte zone dai lâts di Fusinis.

◆ Chestis indagjins a àn permetût di verificâ ce che si ripuarte culi sot. La specie, dal so prin insediament si è espandude massime bande soreli a mont, sul imprim in areis prealpinis e dopo ancje in zonis alpinis.

• Cumò la Begarole dai Urâi si cjate, in mût iregolâr, massime dilunc dal confin cu la Slovenie, de Valcanâl aes Vals dal Nadison (Caravanchis, Alps e Prealps Juliis), ma si cognossin altris popolazions.

• L'areâl talian al insist in pratiche dome in Venit (Bosc dal Cansei e, forsit, Cjadovri).

• Lis zonis dulà che la nidificazion e je certe o probabile a son 7 (Vals dal Nadison; Bosc dal Cansei; Prealps dal Arzin; Alps Cjargnelis; Prealps Juliis; Alte Val dal Tiliment; Valcanâl).

• La popolazion taliane e je stimade in 30-50 cubiis.

• Lis cubiis teritoriâls a son stadis cjatadis di 600 a 1700 m s.l.m., in boscs dulà che lis speciis di arbui plui comuns a son il faiâr (*Fagus sylvatica*) e il peç (*Picea abies*).

• La espansion dal areâl e je stade favoride dal invencjament gjeneralizât dai boscs e dal abandon di grancj setôrs di chei: la presince di arbui muarts, vecjos e/o cun busis, e di plantis rotis, e favoris la specie. Invezit la lôr mancjance in boscs sfrutâts dulà che a son rârs ancje i vecjos nîts dai uciei di rapine diurnis, che la Begarole e pues doprâ, e à duncje tant che risultât il sbassâsi dal sucès riprodutif.

• Lis densitâts otignudis intes trê areis (comprendudis fra 1,6 e 1,9 teritoris/10 Km<sup>2</sup>) a son dentri dal grant interval che si rigjave de bibliografie di setôr.

Tal cors dai vincj agns di studis, a son saltadis fûr diviersis criticitâts in merit ae conservazion, validis

ancje par altris speciis, che a incidin su dut l'ecosisteme forestâl e che a puedin jessi sintetizadis come che si lei ca sot.

• Mancjance cuasi total, tes leçs e tai regolaments su lis utilizazions forestâls, di considerazion de esistence di altris specis vegetâls e animals in plui di chês di interès dome forestâl e di economie "svelte".

• Ancje cuant che tes leçs e tai regolaments si trate di biodiversitât, chê e je cuasi simpri subordenade a aspjets di caratar economic e burocratic.

• Sejarse o nissune cognossince, o interès personâl (*sensu lato*) di bande di diviers di chei che a scrivin o che aplichin leçs e regolaments.

• Superficialitât che cun chê dispès si tratin i aspjets "ambientâi".

◆ Dut chest al compuarte che la presince di speciis tant che la Begarole dai Urâi, no dome no je cognossude, ma e devente motîf di interès eventûâl dome pe divignince stimade esotiche par vie dal non (come plui voltis verificât dal autôr), ma no motîf di interès pe conservazion de specie e dal habitat dulà che e vîf. Al sarès invezit fundamentâl preservâ grandis areis cun habitat intat e no framentât. Ceste prevision si scuinter cu la disponibilitât di bêçs publics pe realizazions di oparis (par esempli, stradis forestâls) che a incidin in maniere pesante ancje su zonis che ancjemò cumò a mantegnin un bon grât di naturalitât, e l'impad di chês in fase progjetuâl preliminar al è valutât nul o trascurabil, ancje in mancjance di dâts necessaris par une valutazion corete o in presince di elements ostatics evidents.

◆ In plui di chest, la viabilitât forestâl, motivade di esigjencis silvicolturâls, e devente dispès vie di passaç di mieç motorizâts no autorizâts, o autorizâts pai motîfs plui diviers, ancje par manifestazions motoristichis in plen periodi riprodutif dai animâi. ■


## FANTATS E FUTÛR

## Si rive ae autodeterminazion des feminis dome traviers di istruzion e educazion

Marianna Tonelli

**L**a volte stade o vin considerât che lis politichis di contigniment demografic che a son stadis metudis in vore in Cine e Indie a àn vût un risultât positîf in tiermins di riduzion dal impad demografic (la popolazion cinese e tache a stabilizâsi e chê indiane i larà daûr), ma di chê altre bande a son stadis imponudis cu la fuarce, invezit di invistî su la istruzion. Chest al à puartât a problemis tant che abort seletif e abandon

di frutinis piçulis, stant che lis fameis a sielzevin dispès di tignî un fi invezit che une fie. Si è cussî determinât un scompens tra oms e feminis, prin di dut pal numar no ecuilibrât dai doi gjeners inte popolazion, ma ancje pe incressite des violencis, massime di bande di oms zelôs. Par cont gno, i "esperiments" fats in Cine e Indie a mostrin che la uniche strade percoribile par rivâ a une planificazion demografiche e je la



educazion. Si à di fat viodût che "lis feminis indianis che a rivin inte scuele superiôr a àn in medie 1,9 fis ognidune. Chês che si laurein a 'nd àn 1,6. Il tas di natalitât des feminis cence istruzion al è di 6,0 fis ognidune", come che al conte



Alan Weisman in "Conto alla rovescia. Quanto ancora potremo resistere?", un so libri dal 2014. Dâ aes feminis il podê di istruîsi e di decidi cuant e se fâ fruts al è un dai ponts fundamentâi dal feminisim mondiâl. Di simpri, la

femine e je stade viodude tant che une proprietât, prin dal pari e dopo dal so om, e tant che une machine par fâ fruts prin che une creature umane. Il moviment feminist al à cirût e al cir ancjemò di rivâ ae paritât di dirits e si pues di che lis robis a son in part cambiadis, ma no par dut il mont. Pensait par esempli che vuê 123 milions di fruts no frecuentin la scuele elementâr, e la maiorance di lôr e je componude di frutis. Chest disequilibri si pues cjatâ fûr tal fat che diviersis fameis a tindin a mandâ a scuele i fis masclis pluitost che lis feminis. A restin ancje causis gjenerâls plui comunis che a impedissin la istruzion a ducj i doi i ses: la puaretât, la inacessibilitât des scuclis, la voie dai gjenitôrs di mandâ i fruts a vore za di piçui par judâ la famee e la mancjance di une istruzion di base di cualitât (come che al dîs l'UNICEF). ■

---

**Par viodi chei altris contignûts  
de “La Patrie dal Friûl”,**

abonaitsi. Dutis lis informazions si cjatin sul sît  
**[www.lapatriedalfriul.org](http://www.lapatriedalfriul.org)**



**Per vedere gli altri contenuti  
de “La Patrie dal Friûl”,**

abbonatevi. Tutte le informazioni si trovano sul sito  
**[www.lapatriedalfriul.org](http://www.lapatriedalfriul.org)**

Che tu sedis za abonât o che tu le vedis lete dome cualchi volte,  
aboniti o rinove l'abonament a un mensîl unic:

**almancul une volte al mês, lei par furlan!**

